



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

23. Kalenderwoche – ab 7. Juni 2009

Alles was reschds is...

Nee, de DDR is werglisch e beesor Unreschdsschdaad gewähsn. Das hamm mir dazumals ehm bloß gahr nisch so sähr gemärgd. Mir hamm mähr so dahingelähbd – friedlich – un hamm uns andauornd offgeräschd, weils irschendwas nisch gegähm had. Odor weil irschendwas im Betrieb nisch geglabbd had. Oder weils doch e bißl zu dähmlisch war, was in dor Zeidung geschdandn had.

Jedzde, wo uns nu de Wessis jedn Daach off de Buddorbemme schmiern dun, was mir ma fiehr e Unreschdsschdaad gewähsn sinn, da duds eim nadiehrlich wie Schubbn von de Oochn falln. Ja, mir sinn werglisch kee eschdor Reschdsschdaad gewähsn! Ehor ehm e Linksschdaad!

Guhd, villeischd had ooch dazumals bei uns dor eene odor dor annre heimlich eene reschde Gesinnung gehabd, abor wennor erwischd wordn is, gabs Ärschor. Nee, dass da welsche frei draußn rumloofn durfdn - mid so Gladze un Schdiefl un so Nazi.-Simbohle off dor Jagge – nee, sowas hads doch werglisch nisch gegähm. Un ooch so Aldnazis in de Ämdor odor in Schuln un so... - wennse erwischd wordn sinn, wars aus! Das braune Gabidahl war ja schon von alleene gleisch nachm Griesch in dähn Wesdn geflohn. Nee, e Reschdsschdaad warn mir werglisch nisch!

Nu sachn die ja driehm, dass bei uns im Osdn heide so viele Leide Reschds wähl'n dun, das däde eene Folsche sein von dor ideologisch'n Vorblendung dazumals... un se sachn, dass linksgommunistisch leischd in reschdsradigahl umschlach'n däde.

Nascha, un wenn das ooch so sein söllde, isch weeiß jedzde nisch, wohähr die nu das Reschd nemm, sisich uns geschnibor so in de Brusd zu schmeiß'n, als wie wennse schon immor de Edelmänschn dor

Sorde A gewähsn sinn. Un daderdrum duds doch gehn! Die wolln scheen sein! Un daderzu brauchsde jemand, dähr häßlich is. Im Vogleisch. Die redn uns also jedzde ein, dass mir schon immor häßlich warn. Un mir fang nu langsam an un gloom das. Off dor annorn Seide redn die sisch selbor ein, dass schon immor scheen warn. Un die fang nu ooch langsam an un gloom das. Daderbei isses doch abor bald vierzisch Jahr so gewähsn, dass keenor so genau wussde, währ dor Scheensde is. Ooch die driehm sinn da eischendlich reladief zurighaldend gewähsn un hamm vorsichdshalbor off friedlische Goegsisdenz gemachd. Ooch driehm had ja keenor dadermid gereschned, dass mir bledzlich keene LUSD mähr off Sozjalimus hamm dun. Es had ja dazumals ooch driehm viele gegähm, die Sozjalimus gahr nisch so häßlich gefundn hamm. Schon ehm bezieschlich sozjahle Söchorheid un Gulduhr un Bildung un so!

Irschendwie hamm die Wessis jedzde Alzheimer gegrischd. Die kenn sisch eenfach nisch mähr dran erinnorn, dass ooch ma bißl Sozjalismus hamm wolldn. Villeischd nisch unbedingt mid Erisch Honeggor un dor vorkalkdn Aldherrenriesche von Wandlidz an dor Schbidze... abor ehm e bißl Sozjalismus – das däde wie Salz in dor Subbe von dor Margdwerdschafd sein!

Nee, werglisch schade, dass de Wessis so vorblendend sinn.

Eduard Sachsenmeyer